

太平寰宇記

第四十四册

太平軍年記

吳昌言撰

太平寰宇記卷之一百八十

四夷九

西戎一

西戎總述

古西戎之域蓋自古肅州

古月氏國

以南甘

古張掖郡

涼

古武威郡

洮

古臨洮郡

鳳龍茂隆蜀邛

古臨邛郡

雅黎

古沈黎郡

嶠

古越嶠郡

等

州之西竝西夷也昔禹之理平九州聲教所暨西

被于流沙流沙今甘州距長安二十五日里服之

制去王城面二千里之外是爲荒服五百里又導

弱水至合黎餘波入于流沙弱水亦今甘州然則

禹之所加功焉蓋今甘之西則在荒服之外矣舜
放三苗于三危三危在燉煌今沙州古允姓之戎
所居也夏后相征畎夷犬夷七年乃服桀之亂犬
夷入居邠岐成湯攘夷狄高宗伐鬼方至武乙時
犬戎寇邊周古公避戎于岐山蓋漸揉于中國矣
渭南潁首莫不有戎周貞王八年秦厲公滅大荔
而取其地韓魏稍并伊雒之戎滅之其遺者西走
踰汧隴中國自是無戎寇及秦昭王滅義渠戎置
隴西北地上郡始皇平天下西逐諸戎出塞故漢
初西戎尙微弱景帝時研種羌按說文羌西戎牧羊人也從人從羊

風俗通云本戎之牧羊人也

求徙于狄道安故

今蘭州縣

至漢武帝

時北患匈奴之強因問匈奴降者言月氏王嘗爲匈奴所破遁逃恆怨匈奴無與共擊之者武帝因令張騫由匈奴中而使月氏爲匈奴所得亾走西數十日至大宛傳致大月氏凡十三歲乃還騫所至大宛月氏康居大夏及傳聞其旁國五六

安息犂軒

奄蔡烏孫樓蘭條支身毒扞彌于闐

初漢通西南夷費多罷之騫言

大夏東南有身毒國有蜀物去蜀不遠乃復通西南夷元狩二年乃命驃騎破匈奴西邊數萬人渾邪王降漢卽以其地置張掖酒泉武威燉煌謂之

河西四郡其地勢西北斜出在匈奴之西烏孫之
南西羌之東北隔絕西羌與匈奴相連之路所謂
斷匈奴右臂于是始築令居塞令音鈴今鄯州西北酒泉列
亭障至玉門矣其地南北有大山中央有河東西
約六千里南北千餘里東則接漢阨以燉煌界內
玉門陽關爲隔西則以葱嶺諸國爲隣有三十六
國其俗大率土著有城郭田畜與烏孫異故始皆
役屬匈奴匈奴西邊日逐王領西域賦稅諸國取
富給焉其南山東出金城今蘭會河鄯四州是漢金城郡也與漢
南山聯焉自玉門陽關出西域有兩路從鄯善旁

南山北循河西行至莎車爲南道西踰葱嶺則出

大月氏安息自車師前王庭

今西州

隨北山循河西

行至疏勒爲北道北道西踰葱嶺則出大宛康居

奄蔡焉自李廣利伐大宛之後西域震懼多遣使

來貢獻于是自燉煌西至鹽澤

卽蒲昌海在今西州北庭界河地是

也往往起亭障是爲漢提封之域焉其後都尉桑

弘羊請田輪臺渠犂以東之地以資邊用竟不成

昭帝時乃用弘羊前議以田給使外國者至宣帝

時使衛司馬使護鄯善以西數國及破姑師未盡

殄分以爲車師前後王及山北六國時漢獨護南

道未能盡并北道也神爵三年匈奴日逐王來降
護鄯善以西使者鄭吉迎之乃因使吉并護北道
故號曰都護都護之起自吉置矣由是匈奴益弱
不得近西域于是徙屯田于北胥鞬披莎車之地

鞬音乾披分也

屯田校尉始屬都護都護督察烏孫康居

諸外國理烏壘城去陽關二千七百三十八里與
渠犂田官相近土地肥饒于西域爲中故都護理
焉至元帝時復置戊己二校尉屯田于車師前王
庭戊己中央鎮伏四方又開渠播種以爲厭勝故曰戊己焉哀平閒自分割爲
五十五國凡國自譯長城長君監吏大祿百長千

長都尉且渠當戶將相至侯王皆佩漢印綬凡三百七十六人而康居大月氏安息罽賓烏弋之屬皆以絕遠不在數中其來貢獻則與相報不督護總領也至王莽時四邊亂與中國遂絕竝復役屬匈奴按前往西域有二道自元始以後有三道從玉門關西出經婼羌

婼音而遮切

轉西越葱嶺經懸度

入大月氏爲南道從玉門關西出發都護并迴三隴沙北頭經居盧倉從沙西北過龍堆到故樓蘭轉西詣龜茲至葱嶺爲中道從玉門關西北出經橫坑辟三隴沙及龍堆出五船北到車師界戊己

校尉所理高昌轉西與中道合龜茲爲新道後漢
永平中匈奴乃脅諸國共寇河西郡縣城門晝閉
明帝乃命將出征匈奴取伊吾盧地置宜禾都尉
以屯田遂通西域于闐諸國西域自絕六十五載
乃復通焉其後班超定西域至于海濱四萬里外
皆重譯入貢自魏至唐歷代貢獻此皆西域塞外
之羌夷也其居中國今附之于篇末焉

車師國

後爲高昌

車師前王後王竝漢時通焉前王國一曰前部理交
河城今交河郡本河州也水分流繞城下故爲號

初漢武帝征和四年遣重合侯馬通將諸國兵共
圍車師車師王降服後其王烏貴與匈奴爲親教
匈奴遮漢道通烏孫者宣帝地節二年遣侍郎鄭
吉校尉司馬憲許吏切將免刑罪人田渠犂積穀欲

以攻車師至秋收穀吉憲發城郭諸國兵擊車師
攻交河城破之王尙在北石城未得會吉食盡歸
渠犂田秋收後更往攻石城王乃輕騎奔烏孫吉
還渠犂及車師益積穀以安西國侵匈奴匈奴單
于大臣曰車師地肥美近匈奴使漢得之多田積
穀必害我國不可不爭也遣騎來擊吉吉將田卒

保車師城匈奴圍城數日乃解吉上書言車師去
渠犂千餘里閒以河山北近匈奴漢兵在渠犂者
勢不能相救願益田卒于是故車師太子軍宿在
焉耆者立以爲王盡徙車師國人令居渠犂遂以
車師故地與匈奴車師王得近漢田官與匈奴絕
亦安樂親漢其後置戊己校尉屯田車師故地今即
交河郡漢取之以置校尉平帝元始中車師後王國有新道出
五船北通玉門關往來差近戊己校尉徐普欲開
以省道里半避白龍堆之阨車師後王姑句音鉤以
道通當爲拄置心不便也拄支也言所置立而拄于已故心不便也拄音

竹羽切

地又頗與匈奴南將軍地接其後舉國降匈

奴是時王莽易匈奴單于璽單于大怒擊北邊而西域亦瓦解焉者國近匈奴先叛殺都護但欽莽不能討西域因絕至後漢和帝永元二年大將軍

竇憲破北匈奴車師震懾

之涉切

前後王各遣子入

侍其後屢叛至安帝延光四年長史班勇擊其後王軍就大破斬之桓帝永興初後部王阿羅多攻圍漢屯田且固城殺傷吏士後部侯炭遮領餘人叛阿羅多詣漢降阿羅多從百餘騎亾走北匈奴中漢立後部故王軍就質子卑君爲後部王後阿

羅多復從匈奴中來降于是更立阿羅多爲王仍將卑君還燉煌以後部人三百帳別屬役之食其稅帳者猶中國之戶數也至魏時賜其王一多離

守魏侍中號大都尉晉以交河城爲高昌郡

蓋因其地

高敞人庶昌盛立名或云昔漢武遣兵西討師旅頓敞者因住焉漢時高昌故壘也

張軌呂

光沮渠蒙遜在河西皆置太守以統之後魏太武

帝時其前部王爲沮渠無諱所攻遣使上表云不

能自全遂捨國東奔三分免一已到焉耆東界思

歸天闕幸垂賑救魏使撫慰開焉耆倉給之文成

末其地又爲蠕蠕所并立闕伯周爲王

高昌稱王自此始也

闕苦
濫切

孝文太和五年高車王阿伏至羅殺闕王以

燉煌人張孟明爲高昌王太和二年孟明爲國人
所殺立馬儒爲王以鞏顧禮麴嘉爲左右長史儒

又通使後魏請內屬人皆戀土不願東遷相與殺

儒立嘉爲王麴嘉字靈鳳金城郡榆中人也

今郡地

旣立爲王會焉耆爲嘽噠所破眾不能自立請主
于嘉嘉遣其第二子爲焉耆王由是始大益爲國
人所服其都城周迴一千八百四十步于坐室畫
魯哀公問政于孔子之像國內有城十八置四十
六鎮官有令尹有交河公有田地公皆其王子也

餘官多同中國大事決之于王小事則世子及二公隨狀斷決平章錄記事訖則除籍書之外無久掌文案官人雖有列位竝無曹府唯每朝集于朝門評議眾事諸城各有戶曹水曹田曹每城遣司馬侍郎相監檢校名爲城令服飾丈夫從胡法婦人略同華夏兵器有弓箭刀楯甲稍文字亦同華夏兼用胡書其國北有赤石山山北七里有貪汗山夏有積雪此山之北鐵勒界也從武威西北有捷路度沙磧千餘里四面茫然無有蹊徑欲往者不準記唯以人畜骸骨及馳糞爲驗路中或聞

歌哭之聲行人尋之多致亾失蓋魑魅魍魎也故商旅往來多取伊吾路去孝明帝正光中嘉遣使求請五經諸史并請國子助教劉燮以爲博士隋文帝開皇中突厥破其四城有二千人來歸中國嘉孫伯雅立其大母本突厥可汗女其父死突厥令依其俗伯雅不從者久之突厥逼之不得已而從煬帝大業五年伯雅來朝因從擊高麗還尙宗女華容公主八年歸蕃至唐武德七年遣使獻狗雌雄各一高六寸長尺餘性甚慧能牽馬銜燭云本生拂菻

中國有拂菻狗自此始

其後不供職貢貞觀四年